

Siusinaartumik pensionisiaqarnermut maalaaruteqartarfik pillugu Namminersorlutik Oqartussat nalunaarutaat

Siusinaartumik pensionisiat pillugit Inatsisartut inatsisaanni nr. 40, 9. december 2015-imeersumi § 10, imm. 2 naapertorlugu aalajangersarneqarput:

Kapitali 1

Maalaaruteqartarfip ilaasortalersugaanera

§ 1. Siusinaartumik pensionisiaqarnermut maalaaruteqartarfik tassaavvoq kommunalbestyrelsip siusinaartumik pensionisiat pillugit Inatsisartut inatsisaat naapertorlugu, inuup sulisinnaassusiata procentianik aalajangiineranik allaffissornikkut naammagittaalliorarfik.

§ 2. Siusinaartumik pensionisiaqarnermut maalaaruteqartarfip ilaasortarai siulittaasoq inatsisilerituutut ilinniarsimasoq ilaasortallu allat marluk.

Imm.2. Siulittaasoq, siulittaasulluunniit tamatumunnga piginnaatitaa maalaaruteqartarfik sinnerlugu kinnertartuuvoq.

§ 3. Siusinaartumik pensionisiaqarnermut maalaaruteqartarfip siulittaasua (kinguliini taagorneqartoq Siulittaasoq) ilaasortallu allat, kiisalu taakkununnga sinniisussat Naalakkersuisunit toqqarneqartarput. Siulittaasup sinniisussaa ilaasortallu sinniisussaat Siulittaasutuulli aamma maalaaruteqartarfimmililaasortatuulli inuttut ilinniakkatigullu piukkunnaateqartuussapput.

Imm.2. Siulittaasoq ilaasortarluunniit ataatsimiinnissami peqataasinnaangippat Siulittaasup sinniisussaa ilaasortalluunniit sinniisussaa ataatsimiigiaqquneqassaaq. Aamma taamaassaaq Siulittaasoq ilaasortarluunniit suliassamut suliarineqartussamut aalajangersimasumut attuumassuteqarpat.

Kapitali 2

Ingerlatsineq pillugu inatsiseqarnermi maleruagassat il.il.

§ 4. Siusinaartumik pensionisiaqarnermut maalaaruteqartarfik pisortat ingerlatsinerannut ilaavoq. Maalaaruteqartarfimmililaasortat taakkununngalu sinniisussat, taamatullu aamma maalaaruteqartarfip allattoqarfia ingerlatsinerminni pisortat pillugit inatsiseqarnermi maleruagassani atuuttuni, matumani aamma pisortat ingerlatsineranni suliassat suliarineqartarnerat pillugu Inatsisartut inatsisaanni, suliassamut attuumassuteqarneq nipangiussisussaatitaanerlu pillugit maleruagassani pineqartunut ilaapput.

Imm.2. Siusinaartumik pensionisiaqarnermut maalaaruteqartarfiup suliamut immikkut ilisimasalik paasissutissat isertuussassat, maalaaruteqartarfiup pineqartumut ingerlateqqissimasai pillugit nipangiusimanneqqullugu allakkatigut peqqussavaa.

§ 5. Siusinaartumik pensionisiaqarnermut maalaaruteqartarfimmi ilaasortat taakkununngalu sinniisussat suliamik isumaginissaanut atortussat tigusimasamik inunnit susassaqanngitsunit pissarsiarineqannginnissaat paasineqannginnissaalluunniit qulakkiigassaraat. Maalaaruteqartarfimmi ilaasortat taakkununngalu sinniisussat suliamik isumaginissaanut atortussat tigusimasatik ilaasortaajunnaarnerminni utertissavaat.

Kapitali 3

Suliassat piareersarneqarnerat aamma aalajangiiffigineqarnerat

Suliassat piareersarneqarnerat

§ 6. Naalakkersuisut Siusinaartumik pensionisiaqarnermut maalaaruteqartarfik, aningaasanut inatsisini ukiumoortuni aningaasaliissutit periarfissarititaat naapertorlugit allattoqarfeqartissavaat.

Imm.2. Naalakkersuisut sulisunik, naammagittaalliuutit tiguneqartut ingerlaavartumik piareersarnissaannut, suliarineqarnissaannut aalajangiiffigineqarnissaannullu pisariaqartumik piukkunnaatilinnik atorfinitssissapput.

§ 7. Siusinaartumik pensionisiaqarnermut maalaaruteqartarfiup allattoqarfiata (kinguliini taaneqartoq Allattoqarfik) maalaaruteqartarfiup suliassai aaqqissutissavai.

Imm.2. Allattoqarfiup suliassat ataasiakkaat maalaaruteqartarfimmit suliarineqartussatut aalajangiiffigisassatullu qaqugukkut saqqummiunneqarnissaat aalajangissavaa.

§ 8. Allattoqarfik suliassat suliarineqarnissaannik piareersaanermik, suliassat paasissutissartaannik pissarsiniarnermik aamma maalaaruteqartarfimmi aalajangiinissamut suliaqarnissamullu siunnersuusiornermik isumaginnituussaaq.

§ 9. Allattoqarfiup communalbestyrelsi siusinaartumik pensionisiat pillugit naammagittaalliorumut tunngatillugu suliassap paasissutissartaasa tamarmik assilineqarnerinik naammagittaalliummullu oqaaseqaammik qinnuigissavaa.

§ 10. Allattoqarfiup suliassaq Siusinaartumik pensionisiaqarnermut maalaaruteqartarfiup suliarisinnaasaanut ilaanersoq, naammagittaalliuutillu naammagittaalliorissamut piffissaliussap qaangiutinnginnerani maalaaruteqartarfimmut nassiunneqarsimanersut aalajangissavaa.

Imm.2. Allattoqarfiup aalajangiinerit imm. 1 naapertorlugu aalajangerneqartut maalaaruteqartarfiup ataatsimiinnissaani tulliuttumi siullermi ilisimatitsissutigissavai.

Siulittaasup aalajangiinera, allakkatigut suliarinninneq aamma ataatsimiinneq il.il.

§ 11. Siulittaasup suliassat Siusinaartumik pensionisiaqarnermut maalaaruteqartarfiup maannamut periaaserisai naapertorlugit nalorninartortaqanngitsut aalajangiiffigisinnaavai.

Imm.2. Siulittaasup imm. 1 naapertorlugu piginnaataaffini Allattoqarfimmum tamakkiisumik ilaannakuusumilluunniit isumagitissinnaavai.

Imm.3. Siulittaasup aalajangiinerit imm. 1-imiit 2-mut naapertorlugit aalajangerneqartut maalaaruteqartarfiup ataatsimiinnissaani tulliuttumi siullermi ilisimatitsissutigissavai.

§ 12. Suliassat Siulittaasup naliliinera malillugu allakkatigut suliarineqarsinnaallutillu aalajangiiffigineqarsinnaasut aalajangiinissamut inassuteqarluni Siusinaartumik pensionisiaqarnermut maalaaruteqartarfiup ilaasortaanut nassiunneqarsinnaapput. Suliassap ataatsimiinnermi suliarineqarnissaa ilaasortamit ataatsimit qinnutigineqarpat tamanna pissaaq, tak. § 13.

§ 13. Siusinaartumik pensionisiaqarnermut maalaaruteqartarfiup suliassat ataatsimiinnerni suliaralugillu aalajangiiffigissavai. Siulittaasoq malaaruteqartarfiup ataatsimiinnerinik aqtsisuussaaq.

Imm.2. Ataatsimiinnerit videokkut qarasaasiakkut, oqarasuaatikkut assigisaatigulluunniit ingerlanneqartassapput. Immikkut ittunik aalajangersimalluinnartunillu pissuteqarluni imminut tikilluni ataatsimiinnissaq pisariaqarpat siulittaasup imminut tikilluni ataatsimiinnissaq aalajangersinnaavaa.

§ 14. Siusinaartumik pensionisiaqarnermut maalaaruteqartarfiup piffissat ataatsimiiffissai oqaluuserisassaalu Allattoqarfip aalajangersartassavai. Naammagittaalliuutit tiguneqartut ataatsimiittarnerni ingerlaavartumik suliarineqarlillu aalajangiiffigineqartassapput.

Imm.2. Ataatsimiigiaqqusinerit ullunik 14-inik piffissaqartitsilluni pisassapput. Ataatsimiigiaqqusinernut ilanngullugit nassiunneqassapput oqaluuserisassat, suliassat saqqummiunneqarnerat aamma naammagittaalliuutit ataasiakkaat maalaaruteqartarfimmit aalajangiiffigineqarnissaannut inassuteqaatit kiisalu suliassanut atortussat pisariallit.

Imm.3. Suliassaq aalajangersimasoq sivikinnerusumik piffissaliilluni ataatsimiigiaqqusinissamut immikkut pissutissaqartitsippat Allattoqarfik, Siulittaasoq isumasioreerlugu taamaaliorssinnaavoq.

§ 15. Siusinaartumik pensionisiaqarnermut maalaaruteqartarfik aalajangiisinnassuseqaassaaq maalaaruteqartarfimmii ilaasortat taakkununngaluunniit sinniisussat tamarmik ataatsimiinnermi peqataappata.

§ 16. Siusinaartumik pensionisiaqarnermut maalaaruteqartarfiup ataatsimiinneri tamanut ammasuunngillat.

Imm.2. Allattoqarfimmi sulisut maalaaruteqartarfiup ataatsimiinnerini Siulittaasup aalajangiineratigut peqataasinnaapput.

Imm.3. Allattoqarfip suliamic immikkut ilisimasallit suliassap erseqqissaassutigineqarnerani ikiuussinnaanerat, Siulittaasoq isumasioreerlugu aalajangersinnaavaa. Suliamik immikkut ilisimasallit maalaaruteqartarfiup suliassamik suliaqarnerani aalajangiineranilu peqataasinnaanngillat.

§ 17. Allattoqarfik Siusinaartumik pensionisiaqarnermut maalaaruteqartarfiup ataatsimiinnerisa imaqarniliornerannik suliaqassaaq. Imaqarniliatut siunnersuutip allaqqaerneqarnera maalaaruteqartarfiup

ataatsimiinnerata kingorna kingusinnerpaamik sap.ak. 4-t qaangiunneranni nassiusornejassaaq. Oqaaseqaatissat nassiuusuinerup kingorna kingusinnerpaamik ullut 14-it qaangiunneranni Allattoqarfimmut nassunneqassapput. Imaqarniliaq tamatuma kingorna naammassineqartutut isigineqassaaq.

Aalajangiinerit

§ 18. Siusinaartumik pensionisiaqarnermut maalaaruteqartarfiup aalajangiineri amerlanerussuteqarnikkut pissapput.

Imm.2. Maalaaruteqartarfiup aalajangiineri allaganngorlugit aammalu tunngavilersorlugit suliarineqassapput. Maalaaruteqartarfiup aalajangiineri Siulittaasup, maalaaruteqartarfik sinnerlugu atsiussavai. Aalajangiineq isumaqatigiinngiffiusumik aalajangiineruppat ilaasortap immikkut isumaata allanneqarnissa Siulittaasup aalajangersinnaavaa.

Imm.3. Maalaaruteqartarfiup aalajangiinera naammagittaalliuuteqartumut, kommunimut pineqartumut kiisalu llaqtariinnermut, Naligiissitaanermut, Isumaginninnermut Inatsisinillu Atuutsitsinermut Naalakkersuisoqarfimmut nassunneqassaaq.

§ 19. Siusinaartumik pensionisiaqarnermut maalaaruteqartarfiup aalajangiineri, Siulittaasup aalajangiineratigut, kimut tunngasuunerri paasineqarsinnaajunnaarsarlugit tamanut saqqummi-unneqarsinnaapput, tamanut pingaaruteqarpata imaluunniit maalaaruteqartarfiup periaaserisaq pillugu ilitsersuutissatut naleqquppata. Tamanut saqqummiussineq nalisaalluni, maalaaruteqartarfiup aalajangiinerani suut pingaaruteqartinneqarneri tamanullu pingaaruteqarsorineqarneri imaluunniit maalaaruteqartarfiup periaaserisaq pillugu ilitsersuutissatut atorneqarsinnaasorineqarneri taallugit issuaanikkut pissaaq.

Kapitali 4

Ilaasortaajunnaarsitsisarneq aamma nutaanik toqqaasarneq

§ 20. Naalakkersuisut Siusinaartumik pensionisiaqarnermut maalaaruteqartarfimmi ilaasortanik ilaasortaajunnaarsitsisinnaallutillu ilaasortanik nutaanik, matumani aamma Siulittaasumik nutaamik toqqaasinnaapput. Nutaanik toqqaaneq utaqqiisaagallartumik aammalu maalaaruteqartarfiup suliffeqarnermut, isumaginninnermut, peqqissutsimut, ilinniartitaanermut nakorsallu suliaannut tunngasuni tamatigoortumik ilisimasaqarnissaa qulaakkerumallugu pisinnaavoq.

Imm.2. Naalakkersuisut ilaasortaq, matumani aamma Siulittaasoq piffissap, pineqartup toqqagaaffigaata sinnerani ilaasortaajunnaarsissinnaavaat, taassuma sivisuumik napparsimanini allatulluunniit pisinnaannginnini, imaluunniit naleqqutinnginnini pissutigalugu maalaaruteqartarfimmi ilaasortatut sulisinnaannginna paasineqarpat.

Imm.3. Naalakkersuisut ilaasortaq, matumani aamma Siulittaasoq ilaasortaajunnaarsissinnaavaat:

1) ilasortaq suliffeqarnermut, isumaginninnermut, ilinniartitaanermut peqqissutsimullu tunngasut pillugit inatsisit naapertorlugit pisussaaffimminik sumiginnaasimanini pissutigalugu soraarsitaappat imaluunniit akuersisumminik arsaagaappat, imaluunniit

2) ilaasortaq suliassami Napparsimasut Maalaarutaannik Aalajangiisartunit aalajangiiffigineqartumi isornartorsiorneqarpat.

Kapitali 5
Aalajangersakkat assigiinngitsut

§ 21. Siusinaartumik pensionisiaqarnermut maalaaruteqartarfimmi ilaasortat Inatsisartunut Naalakkersuisunullu ilaasortat il.il. aningaasarsiaqartitaanerat il.il. pillugit Inatsisartut inatsisaanni § 18, imm. 1-imi 2-milu maleruagassat naapertorlugit aningaasarsiaqartinneqassapput il.il.

Atortuulerfia

§ 22. Nalunaarut ulloq 1. novemberi 2016-imi atortuulissaq.

Namminersorlutik Oqartussat, ulloq 28. oktober 2016

Sara Olsvig

/

Julie Præst Wilche

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviit
Naalakkersuisut